

**Philologentranskription**

{1} A mon-très honoré et doubté seigneur Monseigneur le senechal de Barrois lieutenant du Roy de Sicile notre seigneur etc. en son duchié de Bar {2} Hennequin Le Brun clerc chevaulcheur d'escuerie du-dit seigneur Roy et le votre honneur service et reverence avec toute {3} humble et dehue obeissance mon-tres honoré et doubté-seigneur plaise vous savoir que par vertu de voz lettres de requestes {4} données au lieu de Bourmont le 6<sup>eme</sup> jour du mois d'octobre l'an 1467, icelles escriptes en parchemin {5} seellées de votre seel et toutes ouvertes adreçant à-noble et honoré seigneur messire Thiebault de Neufchastel chevalier {6} seigneur de Chaptel sur Mezelle et de Bainville, je l'an dessus-dit le 8<sup>eme</sup> jour du-dit mois acompagné {7} de Jehan de Guerrande clerc juré de Lamarche et de Jehan de Vesoulz aussi chevaulcheur du-dit seigneur {8} Roy me transportay devant la place de Chastel sur Mozelle au bout du pont auquel lieu trouva {9} ung nommé Jehan d'Andelot bailli et capitaine des gens d'armes estans en la-dite place, lequel me demanda {10} que je demandoie à-quoy lui repondis que voulentier j'eusse parlé à-monseigneur le mareschal de Bourgongne {11} lequel me repondit qui n'estoit pas au lieu mais que monseigneur d'Ericourt son filz y estoit et se je avoye lettres {12} que voulentier lui bailleroit pourveu que je atandisse jusques ad ce qui fust retourné de devers luy et lors {13} bailla vos-dites lettres de requestes au-dit Jehan d'Andelot lequel les portast au dit-seigneur d'Ericourt et me fist demourer {14} l'espace d'une heure et puis retourna devers moy et me dist que vos-dites lettres se adressoient à {15} mon-dit seigneur le mareschal lequel estoit en la court de monseigneur de Bourgongne et que je ly portasse les-dites requestes {16} disant qu'ilz n'avoient nulz messagiers pour y envoyer. Sur quoy leur respondis que je n'avoie nulles ordonnances {17} d'aller à la court de monseigneur de Bourgongne ne aussi de rappourter mes lettres de requestes et pour leurs {18} reffus, je mis les-dites requestes sur une baire voulante et m'en retourna ; et tout ce mon très- honoré et {19} doubté seigneur vous certiffie je soubz mon seing manuel dont je use en mon dit office excercant par moy {20} ainsi avoir esté fait les jours et an dessus-dits.

{gezeichnet}Lebrun